



KEMENTERIAN WILAYAH PERSEKUTUAN

Blok 2, Menara Seri Wilayah, Presint 2, 62100 Putrajaya

Tel: 03-8000 8000 Faks: 03-8889 7957

Laman web: www.kwp.gov.my

SIARAN MEDIA

UNTUK LIPUTAN MEDIA MASSA

MEMBANGUNKAN POTENSI WANITA B40 DI PUTRAJAYA MELALUI PROGRAM MEMPERKASAKAN KOMUNITI 4K

PUTRAJAYA, 6 April 2019 – Jahitan kini menjadi salah satu cabang yang mempunyai potensi besar di dalam perniagaan terutama kepada golongan wanita. Seni jahitan kreatif mula mendapat tempat di dalam kalangan masyarakat seperti jahitan quilt, sulaman, aksesori dan banyak lagi untuk dijadikan punca pendapatan.

Atas kesedaran itu, Kementerian Wilayah Persekutuan (KWP) dengan kerjasama Perbadanan Putrajaya (PPj) dan Persatuan Seni Jahitan Kreatif Malaysia menganjurkan Program Memperkasakan Komuniti 4K kepada golongan wanita dari kelompok B40 di Putrajaya hari ini.

Program memperkasakan komuniti ini memberi fokus kepada program bersifat Keluarga, Kerjaya, Kesihatan serta Kemasyarakatan untuk membangunkan modal insan komuniti setempat khususnya golongan wanita di Wilayah Persekutuan dalam membina kehidupan yang lebih berkualiti dan berdaya saing. Kementerian mensasarkan para peserta yang terdiri daripada golongan belia, suri rumah, pesara, orang kurang upaya serta asnaf.

Kementerian melihat seni jahitan kreatif ini sangat berpotensi memberikan pendapatan yang tinggi kepada golongan wanita khususnya kepada ibu tunggal dan suri rumahtangga sepenuh masa untuk menjadikannya sebagai peluang perniagaan. Hasil jahitan seni kreatif ini berpotensi bukan saja untuk pasaran tempatan malah diyakini mampu dikomersialkan ke pasaran antarabangsa.

Melalui inisiatif ini, Kementerian berharap agar matlamat untuk melahirkan 100 orang usahawan wanita yang boleh menjana pendapatan secara purata RM3,000 sebulan di Putrajaya dapat direalisasikan. Di samping dapat melahirkan lebih ramai lagi perintis Handmade Market yang baharu di WP Putrajaya.

Sebagai pelan jangka panjang program ini, satu laman web khas bakal diwujudkan bagi aktiviti pemasaran semua produk seni jahitan kreatif secara atas talian supaya boleh dibeli dengan mudah oleh orang ramai. Hasil keuntungan dari jualan ini kelak boleh digunakan untuk melatih peserta-peserta baharu yang berminat dalam seni jahitan kreatif. Malah wanita yang bekerjaya juga boleh menjadikan seni jahitan kreatif ini sebagai kerja sampingan mereka dalam menjana pendapatan tambahan.

Disediakan Oleh:

**Bahagian Komunikasi Korporat
Kementerian Wilayah Persekutuan
6 April 2019**